

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

2013-imi aningaasanut inatsimmi 3 mio. kr-inik filmiliornermut tapiissutinik aningaasaleeqqinnikkut 2012-imisulli aningaasanut inatsisaanni annertussusilinnik aningaasaliinissamik siunnersuuteqarnissamik Naalakkersuisut peqquneqarnissaannik Inatsisartuni aalajangiiffigisassatut siunnersuut.
(Inatsisartunut ilaasorta, Doris Jakobsen Siumut)

Tunngavilersuut:

Kulturimut akisussaaffik nunatsinnut nuunneqareernikuummat, nunatsinni filmiliornermut tapiissutit danskit akisussaaffigiunnaarnikuuaat. Kisianni inuusuttortagut filmiliornermut piginnaanillit ineriartortitsinissaminnut tapersersorneqarnissaminnut pisariaqartitsipput. Taamaammat 3 millioner kronit siunnersuutigineqartut, piginnaanilinnut ineriartortitserusuttunut agguaanneqartassapput, suliniutaat isumassarsiatsialaasut piviusunngortinneqarsinnaalerniassammata, nunanullu allanut tuniniaasartunut allanut ingerlatitseqqittartunut tunisassiarineqarsinnaalersillugit.

Taamaasilluta kalaallit filmiliorartuini, isumassarsiaqartuni immitsinnullu qanoq isiginitsinnut iluaqutaaqataasinnaasumik aammalu nunatsinnik nunarsuarmi malunnaateqartitsinnaasumik eqqumiitsuliornissamut piunmassuseqartuni, ineriartulerneq aallarnisartoq tapiissuteqarfigisinnaalissagatsigu.

Nalunngilluinnarpara taakkua 3 million koruunit filmimut Nuummioq-tut ittumut ataasiinnarmulluunniit aningaasaliissutigissallugit naammanngitsut. Tamannalumi aamma siunertarineqanngilaq. Qanorluunniimmi pisinnaalluartigisunik peqartigaluarutta, nunami allamiunik suleqateqarnissaq atorfissaqartipparput. Filmiliorartunik filmfestivalit aaqqissuunnissaannik ilisimasaqartunik, nunallu tamat akornanni filmimik saqqummilaartitsinnaasunik.

Aningaasallu tassa salliutillugu filmip pinngoriartortinneqaleqqaarneranut atorneqassapput. Isumassarsiatsialaap pileqqaarneraniit, tuniniarneqarsinnaasumik isumassarsiap filmiliorartunut aningaasaliisunullu tuniniarneqarsinnaasunngorlugu ilusilerneqarneranut. Tassalu filmiliamut najoqqutassiornerup (manuskripter) ineriartortinneqarneranut aammalu assersuutigalugu isumassarsiamik takutitsisinnaasumik naatsumik takussutissaliornernut.

TV-kkut qallunaat nangeqattaartuliaat Borgen Tuluit Nunaanni takutinneqarmat, tuluppassuit Kalaallit Nunaat aatsaavissuaq takuaat. Nunatut takornariarfigineqarsinnaasutut. Filminut tapiissuteqarnerput aamma nunatta ilisimaneqarneranik siaruarternimut peqataatitsisinnaavoq, taamaasilluni takornariaqarnerulerneranut nunanullu allanut tunisaqarnerunissamut tunngavisseeqataasinnaalluni. Pisinnaasortatsinnut tapiissutigisagut atorluagaapput.

Kulturitsinnuinnaq pikkorissortatsinnullu taamaallaat tunnganngitsumik, aammali aningaasaqarniarnitsinnut.

Aningaasanut inatsit aqqutigalugu filmiliornermut tapiissutinik aningaasaliisoqareerpoq. Aningaasaliissutit taakku siunnersuutigineqartut amerlinerisigut anguniagassat siuliani taaneqartut anguneqarnissaannut periarfissaqalissasugut isumaqarpunga. Taamattaaq taamaaliornikkut filmiliornermi tapeeriaatsimik nutaamik pilersitsinissaq pisariaarutissaaq, tamannalumi siunnersuummi matumani anguniagaanngilaq.

Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaat nr. 10, 21. maj 2002-meersumi maanna atuuttumi kingusinnerusukkut nunani allamiunik suleqatinik aningasaleeqataanissaq siunertaralugu filmiliornissami ineriartortitsinermit tapiissuteqarnissamik tapiissuteqartartut mattunneqanngillat. Taamaalilluni aningaasatigut tunngavissarititaasut atuuppata, siunnersuut inatsisit maanna atuuttut sinaakkutaralugit piviusunngortinneqarsinnaavoq.

Siunnersuutip aningaasatigut allaffissornikkullu kingunissai:

Aningaasaliissutissatut siunnersuutigineqartut aningaasanut inatsimmi konto pingaarnermut 30.21.01 *Kulturimut tapiissutit allat* aningaasaliissutigigaanni tulluartsuusaq, tassuunani filmiliornermut ukiumut 2 mio. kr-it missaanni annertussusilinnik aningaasaliisoqartareerpoq, taamaalillunilu filmiliornermut ataatsimut tapiissutit 5 mio. kr. missaanni annertussuseqalissapput.

Taassumap saniatigut aningaasaliissutit 3 millioner kronit, annikinnerusumik allaffissornikkut aningaasartuutaassapput qinnuteqartartut tunniussaqaqarnerisigut nalilersorneqarneqartarnissaallu eqqarsaatigalugit. Ataatsimut nalilissagaanni allaffissornikkut aningaasartuutit appasissapput filmiliornermut piginnaanillit amerlassusaat eqqarsaatigalugit.

Ilisimasalinnit siunnersuutigineqartut nalilersornissaannut saniatigut aningaasartuuteqarnissaq aamma naatsorsuutigineqassaaq. Taakku qanoq annertutiginnissaannut qinnuteqartut amerlassusaat apeqqutaapput, taamaammallu aamma annikitsuinnaanissaat ilimagineqarluni. Qanorluunniit pisoqaraluarpat pineqartoq pillugu aningaasaliissutit iluini ingerlanneqarsinnaapput.